



**CONVENIO DE COOPERACIÓN EDUCATIVA ENTRE A CONSELLERÍA DE CULTURA,
EDUCACIÓN E ORDENACIÓN UNIVERSITARIA DA XUNTA DE GALICIA E A
CONFEDERACIÓN GALEGA DE PERSOAS CON DISCAPACIDADE (COGAMI)**

En Santiago de Compostela, a 28 de abril de dous mil dezaseis.

REUNIDOS

Dunha parte, don _____, conselleiro de Cultura, Educación e Ordenación Universitaria da Xunta de Galicia, segundo o disposto no Decreto 15/2015, do 9 de febreiro, polo que se nomea conselleiro de Cultura, Educación e Ordenación Universitaria a Román Rodríguez González, de conformidade coas atribucións conferidas no artigo 34 da Lei 1/1983, do 22 de febreiro, de normas reguladoras da Xunta e da súa Presidencia e nos Decretos 129/2015, do 8 de outubro, polo que se fixa a estrutura orgánica das consellerías da Xunta de Galicia e 4/2013, do 10 de xaneiro, polo que se establece a estrutura orgánica da Consellería de Cultura, Educación e Ordenación Universitaria,

Da outra, don _____, presidente da Confederación Galega de Persoas con Discapacidade (COGAMI) -segundo consta na resolución de inscrición no Rexistro de Asociacións realizada o 05 de agosto de 2015 pola Secretaría Xeral Técnica de Vicepresidencia e Consellería de Presidencia, Administracións Públicas e Xustiza-, con NIF G-32115941 e enderezo social na rúa Modesto Brocos nº 7, bloque III, baixo, 15704, Santiago de Compostela (A Coruña); inscrita na Sección 2ª do Rexistro Central de Asociacións da Xunta de Galicia co número 2003/000092-2 (SC),

EXPOÑEN

1. Que a Consellería de Cultura, Educación e Ordenación Universitaria é o departamento da Xunta de Galicia ao que lle corresponden as competencias e funcións en materia de planificación, regulación e administración do ensino regrado en toda a súa extensión, niveis, graos, modalidades e especialidades; tal e como establece o Decreto 4/2013, do 10 de xaneiro, polo que se establece a estrutura orgánica da Consellería de Cultura, Educación e Ordenación Universitaria.

Que a Consellería de Cultura, Educación e Ordenación Universitaria considera como un dos piares fundamentais dun sistema educativo de calidade a atención á diversidade do alumnado, o que esixe unha acción educativa integral que dea resposta axeitada ás



necesidades específicas de apoio educativo, sendo necesario, para este fin, contar con toda a comunidade educativa así como coas entidades, asociacións ou entidades sen ánimo de lucro que adiquen os seus esforzos a esta finalidade.

Neste sentido, tanto na normativa educativa estatal, impulsada pola Lei orgánica 8/2013, do 9 de decembro, para a mellora da calidade educativa, como no desenvolvemento curricular estatal e da Comunidade Autónoma de Galicia, faise explícita a atención ao alumnado con necesidade específica de apoio educativo, entre o que se sitúa o alumnado con necesidades educativas especiais por motivo de discapacidade.

2. Que a Confederación Galega de Persoas con Discapacidade (COGAMI) é unha entidade que carece expresamente de ánimo de lucro, independente, libre, aconfesional, apartidista, non governamental e de carácter voluntario; rexistrada como entidade prestadora de servizos sociais co nº E-154.

Que a Confederación Galega de Persoas con Discapacidade (COGAMI) ten como misión conseguir a plena inclusión das persoas con discapacidade en todos os ámbitos da sociedade, a través da defensa e promoción dos seus dereitos, da reivindicación do cambio social, da potenciación e coordinación do asociacionismo e da prestación de servizos que satisfagan as súas necesidades e expectativas.

Que entre os fins da Confederación Galega de Persoas con Discapacidade (COGAMI) figuran:

- a) Promover a plena integración escolar, laboral e social das persoas con discapacidade.
- b) Promover actitudes sociais positivas cara a persoa con discapacidade.
- c) Reunir e difundir información xeral e especializada sobre as dificultades das persoas con discapacidade.
- d) Desenvolver programas e actividades, dentro da propia discapacidade, dirixidos especificamente á atención da infancia e xuventude.
- e) Promover e poñer en funcionamento todo tipo de iniciativas culturais, educativas e de lecer orientadas ás persoas con discapacidade.

3. Que a Lei orgánica 2/2006, do 3 de maio, de educación (LOE), na redacción dada ao seu título II pola Lei orgánica 8/2013, do 9 de decembro, para a mellora da calidade educativa (LOMCE), reconece que “as administracións educativas disporán os medios necesarios para que todo o alumnado alcance o máximo desenvolvemento persoal, intelectual, social e emocional”, e, para iso, deberán asegurar os recursos necesarios para que o alumnado que requira unha atención educativa diferente á ordinaria poida alcanzar o máximo desenvolvemento posible das súas capacidades.

4. Que o Decreto 229/2011, do 7 de decembro, polo que se regula a atención á



diversidade do alumnado dos centros docentes da Comunidade Autónoma de Galicia nos que se imparten as ensinanzas establecidas na Lei orgánica 2/2006, do 3 de maio, de educación (LOE), dispón que o alumnado con necesidade específica de apoio educativo pode requirir “apoios ou provisións educativas diferentes ás ordinarias” e que “a consellería con competencias en materia de educación promoverá a colaboración entre as distintas administracións, entidades, asociacións e outras organizacións sen ánimo de lucro e con atribucións na prevención, detección temperá e intervención educativa co alumnado, establecendo protocolos comúns de actuación e favorecendo o intercambio de información e a difusión de boas prácticas”.

En atención a estas consideracións, as dúas institucións teñen a vontade de sumar os esforzos que realizan no campo da atención educativa ao alumnado con necesidades educativas especiais por motivo de discapacidade, así como da formación do profesorado e do asesoramento e atención ás familias dese alumnado.

En consecuencia, a Consellería de Cultura, Educación e Ordenación Universitaria e a Confederación Galega de Persoas con Discapacidade (COGAMI) acordan subscribir este convenio conforme as seguintes

CLÁUSULAS

Primeira. Obxecto do convenio

O convenio ten por obxecto establecer as condicións da colaboración entre a Consellería de Cultura, Educación e Ordenación Universitaria e a Confederación Galega de Persoas con Discapacidade (COGAMI) nas accións e actividades dirixidas á mellora da atención educativa e da inclusión do alumnado con necesidades educativas especiais por motivo de discapacidade.

Segunda. Persoas beneficiarias

As persoas beneficiarias da colaboración prevista neste convenio serán o alumnado con necesidades educativas especiais por motivo de discapacidade, de todas as etapas e niveis regulados pola Lei orgánica 2/2006, do 3 de maio, de educación (LOE), escolarizado nos centros docentes dependentes da Consellería de Cultura, Educación e Ordenación Universitaria, así como o profesorado e as familias dese alumnado.

Terceira. Desenvolvemento da colaboración

1. A Consellería de Cultura, Educación e Ordenación Universitaria promoverá na formación permanente do profesorado, que desenvolve por medio das estruturas de formación e nas distintas modalidades formativas, a colaboración da Confederación Galega de Persoas con Discapacidade (COGAMI) nas accións relativas á atención á diversidade e á formación do



profesorado que atende a alumnado con necesidades educativas especiais por motivo de discapacidade.

2. A Consellería de Cultura, Educación e Ordenación Universitaria e a Confederación Galega de Persoas con Discapacidade (COGAMI) colaborarán na sensibilización, na elaboración e na difusión de materiais e documentos que permitan un maior coñecemento das circunstancias específicas asociadas ao alumnado con necesidades educativas especiais por motivo de discapacidade.

3. A Consellería de Cultura, Educación e Ordenación Universitaria facilitará a colaboración do persoal profesional da Confederación Galega de Persoas con Discapacidade (COGAMI) nos centros docentes dependentes da Consellería de Cultura, Educación e Ordenación Universitaria que contén con alumnado con necesidades educativas especiais por motivo de discapacidade.

A solicitude de colaboración do persoal profesional da Confederación Galega de Persoas con Discapacidade (COGAMI) debe realizarse por parte do centro docente e as liñas xerais desa colaboración poderán ser:

a) Asesoramento na atención educativa ao alumnado con necesidades educativas especiais por motivo de discapacidade escolarizado nos centros docentes dependentes da Consellería de Cultura, Educación e Ordenación Universitaria, así como aos centros que escolaricen este alumnado, ao seu profesorado e ás súas familias. A colaboración da Confederación Galega de Persoas con Discapacidade (COGAMI) na atención ao alumnado con necesidades educativas especiais por motivo de discapacidade, no marco que se estableza entre o centro docente e o persoal profesional desa Confederación, poderá contemplar tanto actuacións de carácter preventivo como actuacións concretas co alumnado con necesidades educativas especiais por motivo de discapacidade, co seu profesorado e coas súas familias.

b) Colaboración na orientación sobre metodoloxías axeitadas á intervención educativa co alumnado con necesidades educativas especiais por motivo de discapacidade, sobre a súa avaliación e sobre as adaptacións curriculares que se estimen necesarias.

c) Información e formación naqueles aspectos que o persoal dos centros docentes requira en relación co tratamento do alumnado con necesidades educativas especiais por motivo de discapacidade.

Cuarta. Colaboración do persoal da Confederación Galega de Persoas con Discapacidade (COGAMI) nos centros docentes

1. Tendo en conta os termos xerais referidos na cláusula anterior e o principio de autonomía pedagóxica, organizativa e de xestión dos centros docentes, o director ou a directora de cada centro, o persoal especialista da Confederación Galega de Persoas con Discapacidade (COGAMI) e as familias do alumnado con necesidades educativas especiais



por motivo de discapacidade establecerán os termos concretos desa colaboración. Eses termos deben formar parte das medidas de atención á diversidade previstas no Plan Xeral de Atención á Diversidade; das normas de organización, funcionamento e convivencia, e/ou das correspondentes programacións xerais anuais de cada centro.

2. O profesorado titor ou, se é o caso, profesorado designado pola dirección do centro será o responsable de coordinar as posibles actuacións concretas das persoas especialistas da Confederación Galega de Persoas con Discapacidade (COGAMI) en cada un dos casos e de manter informada a cada unha das familias.

3. As actuacións do persoal especialista da Confederación Galega de Persoas con Discapacidade (COGAMI) nos centros docentes entenderanse dentro do principio de colaboración entre todas as persoas que atenden a un mesmo alumno ou alumna e coa finalidade de facilitarlle unha atención educativa inclusiva e axustada á súa particular forma de ser e de aprender. Este persoal deberá reunir a formación profesional e técnica adecuada que se require para atender a alumnado con necesidades educativas especiais por motivo de discapacidade, ter regularizada a súa situación laboral coa Confederación Galega de Persoas con Discapacidade (COGAMI) ou atoparse vinculada a esta mediante acordo expreso e respectar os principios de autonomía organizativa de cada centro docente, así como o seu proxecto educativo. En todo caso, ese persoal deberá cumprir co que dispón o artigo 13.5 da Lei orgánica 1/1996, do 15 de xaneiro, de protección xurídica do menor (LOPXM), introducido pola Lei 26/2015, do 28 de xullo, de modificación do sistema de protección á infancia e á adolescencia, que establece: “Será requisito para o acceso e exercicio ás profesións, oficios e actividades que impliquen contacto habitual con menores, o non ser condenado por sentenza firme por algún delito contra a liberdade e indemnidade sexual, que inclúe a agresión e abuso sexual, acoso sexual, exhibicionismo e provocación sexual, prostitución e explotación sexual e corrupción de menores, así como por trata de seres humanos. Para este efecto, quen pretenda o acceso a tales profesións, oficios ou actividades deberá acreditar esta circunstancia mediante a achega dunha certificación negativa do Rexistro Central de delincuentes sexuais”.

Quinta. Relacións laborais

A subscrición deste convenio non implica relación laboral contractual ou de calquera outro tipo entre o persoal da Confederación Galega de Persoas con Discapacidade (COGAMI) e a Xunta de Galicia, de tal modo que non se lle poderá esixir ningunha responsabilidade -nin directa, nin indirecta, nin subsidiaria- polos actos ou feitos ocorridos durante a execución das actuacións e/ou a vixencia deste convenio.

Sexta. Comisión de seguimento

1. Para a coordinación e seguimento do desenvolvemento deste convenio constituirase unha comisión mixta, formada por catro persoas. Cada unha das partes designará dúas,



correspondendo a presidencia e a secretaría da comisión ás persoas representantes da Consellería de Cultura, Educación e Ordenación Universitaria.

2. A comisión reunirase, con carácter ordinario, unha vez cada curso escolar. A reunión terá lugar no primeiro trimestre do curso, logo da convocatoria realizada pola presidencia da comisión.

3. Correspóndenlle á comisión mixta as seguintes atribucións:

a) Velar polo adecuado desenvolvemento do convenio e resolver calquera dúbida que se xere respecto del, sen prexuízo do establecido na lexislación correspondente.

b) Analizar o funcionamento desta colaboración e realizar, de ser o caso, propostas de mellora.

c) Elaborar un informe anual sobre o funcionamento do convenio.

Sétima. Avaliación dos procesos de colaboración

1. A avaliación dos procesos de colaboración establecidos entre cada un dos centros docentes e o persoal da Confederación Galega de Persoas con Discapacidade (COGAMI) deseñarase por parte da comisión mixta e nela recollerase información facilitada polo propio centro docente e polo persoal da Confederación Galega de Persoas con Discapacidade (COGAMI).

2. Na reunión ordinaria da comisión mixta analizarase a información recollida no curso anterior e elaborase un informe ao respecto.

Oitava. Interpretación do convenio

As dúbidas que puidesen xurdir en relación coa interpretación das cláusulas deste convenio, que ten carácter administrativo, serán resoltas pola comisión mixta. En caso de discrepancias, a súa interpretación, cumprimento e execución corresponderá aos tribunais contencioso-administrativos, tralo esgotamento da vía administrativa.

Novena. Protección de datos e confidencialidade

1. Ambas partes comprométense a cumprir as obrigas que se derivan da Lei orgánica 15/1999, do 13 de decembro, de protección de datos de carácter persoal, e demais normativa en vigor.

2. No caso de que durante o desenvolvemento deste convenio se puxese de manifesto a necesidade de proceder entre os asinantes a unha cesión ou comunicación de datos de carácter persoal incluídos nos seus respectivos ficheiros, farase de acordo co previsto no Real decreto 1720/2007, do 21 de decembro, polo que se aproba o Regulamento de



desenvolvemento da Lei orgánica 15/1999, do 13 de decembro, de protección de datos de carácter persoal, así como na propia Lei 15/1999.

Décima. *Publicidade do convenio*

Ambas partes comprométense a que na tramitación e desenvolvemento deste convenio se respecte o contido da Lei 1/2016, do 18 de xaneiro, de transparencia e bo goberno.

Undécima. *Vixencia*

Este convenio entrará en vigor o día seguinte ao da súa sinatura e terá duración ata o remate do curso académico correspondente a esa data, sendo prorrogado automaticamente por cursos académicos sucesivos, salvo denuncia expresa dunha das partes asinantes e cunha notificación á outra de dous meses de antelación.

Lido o convenio no lugar e data indicados no encabezamento, atópano conforme, polo que o asinan en triplicado exemplar.

**POLA CONSELLERÍA DE CULTURA,
EDUCACIÓN E ORDENACIÓN
UNIVERSITARIA,**

O CONSELLEIRO,

**POLA CONFEDERACIÓN GALEGA DE
PERSOAS CON DISCAPACIDADE
(COGAMI),**

O PRESIDENTE,